




薦舉將材疏

題爲議薦將材以備擢用事查先准兵部  
咨該本部題各邊地方推用乏人移咨各  
督撫衙門會同巡按御史各將所屬衛所  
指揮鎮撫千百戶及營路中軍千把總等  
官加意諏訪如果年力精強才猷諳練謀  
勇兼長緩急可恃者卽於年終酌量奏薦  
等因題奉

聖旨是各衛所武官材勇堪任的著督撫等官



博訪精覈從公奏薦與武舉相兼備用不  
許冒濫欽此欽遵備咨遵行在卷今照天  
啓元年終已經通行各道從公博訪開報  
去後今據井陘易州等道兵備按察使等  
官熊文燦徐騰芳等各呈報到臣該臣會  
同出鎮行邊總督薊遼保定等處軍務兼  
理糧餉經略禦倭少傅兼太子太傅兵部  
尚書兼都察院右都御史王象乾巡按直  
隸監察御史倪應眷潘文龍巡關御史潘

雲翼查訪得臣標下聽用原任建昌路叅  
將今鄒勝平賊劉宗漢耽戀煙霞興味蕭  
疎于世上蕩除魑魅功名烜赫于人間原  
任馬蘭路叅將今委練車營祁邦定凝重  
屹然山嶽剛明鉅若吳干偶試車攻可膺  
長子原任遵化左營遊擊今咨部候推白  
邦安威震鯨波靜沸勞媿虎穴雄風世仰  
龍韜家延彪烈原任大同入衛遊擊今宣  
大買馬鄭登瀛典牧龍媒入漢小戎駟介

追風挽三石弓稱萬人敵原任山東都司  
今委練標左營蘇從訓竝用恩威能乞三  
軍之命一膺斧鉞可清萬里之塵原任忠  
順營都司今招募新兵王家將肫悃璞衷  
嶙峋劔氣共詫虎林奪幟何難龍朔鳴騶  
原任薊鎮坐營都司今招募新兵薛一鴻  
豪氣撼搖山嶽壯圖呼吸風雲延攬英雄  
發舒忠義原任甘肅行都司李世忠飛將  
名標塞上卧龍籌裕隆中亞子父風良臣

天授原任山陰城守備今咨部留用加銜  
都司僉書曹卓立技藝絕倫胸襟蓋世募  
士熊羆雲集統兵旟旐霜嚴臣標下叅謀  
加銜都司僉書王之蓋義膽忠肝植天經  
而維地紀金弢玉版剽封兕而斷長鯨練  
標右營加銜守備李弘勳兩袖清風一腔  
熱血有志除兇雪耻經時嘗膽卧薪加銜  
守備平山衛指揮僉事李壯圖英姿秀色  
遠志清操彎弧秋月出懷舞劔寒霜林日

監督打造局守備宋篤臣壯略功先函甲  
清操費省金錢武庫蟠曾羽林捷足臣標  
下提塘千總新安衛鎮撫葉深大雅直追  
征虜奇謀寧數叅軍虎旅前茅鴈臣獨步  
臣標下管家丁千總瀋陽中屯衛指揮張  
經緯志切犁庭掃穴技能貫虱穿楊謀裕  
六韜才堪一面真定標營中軍加銜守備  
卞成龍昂昂虎豹英姿矯矯龍鬣偉略威  
孚中勁品超上驥真定標營平妖千總今

改標左營中軍武舉官劉靖海挾輶迅掃  
北妖拔幟克殲東寇一身皆膽百戰扶傷  
真定選鋒營中軍武舉官白之崑長技沒  
金飲羽雄才破浪乘風氣壯燕然志清龍  
幕真定車營中軍武舉官方輔請纓氣壓  
太山借箸籌精黃石干城妙選分閫奇才  
倒馬關平妖中軍今改真定民兵營中軍  
武舉官周鏡奮勇除兇兩地裏創賈壯三  
軍一呼當前萬夫辟易保定車營中軍保

定中衛指揮白秉忠豹略精閑彪軀俊偉  
遇事才堪迎刃當關氣欲吞胡馬水口中  
軍永清衛所鎮撫曹存性韻曼球鳴丰瑩  
珠轉抵掌霜飛寶劔塞旗雲斂玉關紫荊  
關中軍保定左衛前所千戶王國彥器識  
深沉才猷饒裕茹苦腸迴百折挽強力引  
千斤真定標右營中軍武生唐文光七尺  
英標冠玉六花煉冶精金長劔龍吟揮戈  
虎躍茨溝營中軍武舉官潘一枝曾富鷹

揚奇畧神交龍伏才雄劔倚崆峒氣橫牛  
斗保定後衛掌印指揮劉聯芳才雄作賦  
力裕關弓將門不愧箕裘戎塞咸資保障  
真定衛掌印指揮施承元英標玉潤銳志  
金堅催科有撫字之仁樽俎具折衝之畧  
瀋陽中屯衛掌印指揮王國禎武闡入彀  
秣苑窺斑揚旗細柳飈寒洒露中林纒煖  
神武右衛掌印指揮鄭嘉棟年逼終軍度  
擬叔子受約靈通黃石握符心凜清霜保

定右衛掌印指揮許其國識諳龍韜技高  
猿臂續挾三軍日暖劔橫九塞霜寒大同  
中屯衛掌印指揮董允吉視篆不苛不縱  
當機有斷有爲貫斗雄才安邊偉器定州  
衛掌印指揮張拱宸燁燁貌同冠玉閑閑  
度擬衿紳籌足屠龍氣馴伏虎臣標下平  
妖署中軍千總武舉官韓弘譽平妖直抵  
賊巢追逋立擒亡命一腔義膽八面雄鋒  
臣標下平妖千總武生武顯文叱咤千人

自廢驍勇七札皆穿避槊奇能選鋒絕技  
真定標營右部千總武舉官白之裔精工  
技擅落鵬勇健力能扛鼎崢嶸虎將天矯  
龍駒馬水口左哨千總保定後衛左所百  
戶潘延世矢謀確有擔當守已殊甘恬淡  
威揚塞外恩洽軍中臣標下管家丁千總  
武生吳士弘正氣排嶽凌雲剛心斷金裂  
石功收千駟勇冠三軍真定選鋒營千總  
真定衛鎮撫徐來朝聲馳驃騎材度龍驤

笑麾天馬蒲稍怒擊月氏飲器臣標下千  
總武舉官馮生舜氣局干牛射斗才華縛  
虎剽犀功嗣莎車名高大樹真定標左營  
千總武舉官徐顯祚奇謀潛入天淵善令  
人忘湯火沉雄射石整暇趨風真定民兵  
營千總真定衛右所千戶張登雲麾戈赤  
羽飛烟訓武鷁軍吐氣折父牙爪公侯腹  
心倒馬關右哨千總武生王家瑞劒法雙  
龍遶電弦開叠鶻穿雲猿臂英風虎頭壯

志臣標下旗牌武舉官江中柁襟披風颯  
識映霜明蹶張楊葉頻穿撻伐梨花無對  
臣標下旗牌武舉官劉文程談兵鶴列風  
生試劒龍光夜射勇稱超乘才獨冠軍以  
上諸臣皆一時介冑之良所當薦揚以備  
擢用內劉宗漢等二十三員宜于衝邊餘  
則宜于次衝者也抑臣于是更有說焉理  
有經權地有緩急緩則守經急則行權此  
事之必不可易而勢之必不容已者也臣



鎮在

王畿之內而奴氛逼近邪教縱橫此其地之危  
急人人所知也以今日係安係危係存係  
亡之地處今日無兵無馬無器無餉之時  
欲用能謀能練能戰能守之人以收我岡  
我陵我泉我池之績不知必守經耶抑亦  
可濟以權耶語曰權不離經權卽是經夫  
必何如然後爲不離經乎臣以爲秉真正  
心用真正人做真正事則爲築爲釣爲沽  
爲屠不拘拘何途之從而安內攘外故足  
術也假令徇情阻面以

九重之名位供一人之徑竇旋以齷齪之臣子  
壞錦繡之江山此夫私滅公欲害理耳可  
名爲權哉臣受事以來焦心勞思博求精  
察見任諸將如張體乾劉汶陳堯典曹卓  
立寔寥寥晨星而其它無大過亦無大才  
下不至蠹

國殃軍上不能流鴻樹駿而臣所權宜任用

卷之四  
四  
之人多卓犖不羣可濟緩急顧其人不少  
破常格不能收其用

國步危矣鼓舞豪傑是一大機括格局不破  
豪傑不出豪傑不出士氣不奮當是之時  
抗累勝方張之虜而欲振沒世不復之氣  
恐非一二尋常蚩螯之所能辦也伏乞

勅下兵部再加查訪如果臣等所舉非私速將  
劉宗漢等破格推用勿使有約結之嘆庶  
燕趙之豪傑輩出而海內之士必有窺左

足而應者矣天啓三年正月十六日會題

二月初四日奉

聖旨兵部知道

題劉宗漢補紫荆關叅將疏

題爲謀逆元兇就擒人情反側未定懇乞

聖明

亟勅催補將領刻期受事以靖餘氛以固重地  
事臣惟

國家定鼎燕京南面而制天下

都城西南朔易之境障塞鈎連紫荆馬水寔  
稱鎖鑰重地往年易臺憲臣提督彈壓而  
近因地方曠缺姦徒睥睨紫荆有所謂趙

思武者鑄令牌造私曆僭號重明改元太平臣曾親見其書鞫其人口口天分意甚獰爭賴推官范紹序以計擒之而定及沛縣擒獲妖人李英潘文成從其懷中搜令旗一百零六面供吐首在蔚州而蔚州事洩其首則候德張九臯俱紫荆涑水人也時方回關調兵定於十一月初一日起手據紫荆窺

京師矣臣連據紫荆馬水口報規模甚大情

形甚真隨急檄易州道密緝謹防而道臣徐騰芳藏機於靜使不我疾却秘授方略懸重賞以購之於是二賊遂次第就擒搜出龍鳳虎大旗三面白綾令旗四面硃印三方妖說六摺皆甚精而僞署太寶一統僭號玄靜二年令旗六百面鴈翎刀三千口龍衣黃袍及坐纛銅劔之屬稱是此其志豈在小向使兩首不獲彼其氣候通數千里黨與至數十萬稱王稱帝夫寧鼠竊

疏草 卷之四  
狗偷如雨如雲儘足鴟張騷舞天下之禍  
恐不啻鄒滕在千餘里之遠用兵僅五六  
月之近也騰芳不動聲色不煩士馬一指  
授而兩首告殲此其功在奠安

宗祐寧直爲蔚剪亂而已哉顧於此曰妖黨遂  
已洗滌方寓遂已清寧未敢也此輩布滿  
乾坤旣發者雖幸已誅已捕後來者安知  
不愈出愈竒今自紫荆馬水以達於浮圖  
烏龍寧靜之間叅遊守振寂無一人此地

崇山峻嶺峭壁層崖我有之則我重賊有  
之則賊重此輩耽耽山海寔繁有徒儻乘  
關隘之虛窺左足而起臣負地方以負

皇上臣滋懼矣近接邸報馬水口補秦光祚浮  
圖峪補臧震然皆遠在數百里之外或以  
候代迤邐或以過家遷延去者已去來者  
未來猝有聲息何以策應此二臣者所當  
免其候代仍嚴行申飭不許借口過里規  
避春防過二月不到臣得以彈章從事者

也先是遊擊宗維城陞任員缺臣曾咨補  
平妖叅將劉宗漢非私宗漢也欲責將來  
之效無如已效之人方武邑事起叅將張  
體乾實以赴充兵剿平之而搆石傷重具  
文陳請臣恐三軍之無統也造劉宗漢家  
起而用之宗漢杜門不出業已十年而獨  
感臣之禮之也慷慨願以身往臣於其行  
舉酒祝曰天津諸將初發時皆以加銜  
題實職此行勲勞決不相負臣之口血固未

乾也宗漢到彼凡四月獨當東門一百東  
門爲鄒首衝蓋鄒勝之賊互相往來必繇  
東門而東門外大山峙立草木茂密城中  
無薪樵採於此以故賊日夜從東門縋城  
不斷我兵欲扼賊吭計必宿重兵于此而  
先是交鋒者數矣人人畏避乃宗漢毅然  
當之中軍周鏡千總劉靖海郭名揚皆被  
鉛子打透咽喉雖賴舊識許定國以線縫  
之不至殞斃而靖海鉛子迄今尚未出也

三山之戰忠順營指揮使慕聖希死之監  
軍僉事來斯行吊死撫傷先後賞銀四十  
五兩宗漢對衆立散人忘其勞監軍具稟  
報臣真保將士攻城對敵奮勇爭先而戈  
里一戰甚著勞績卽今築圍浚壕樹柵掘  
道功力甚苦今鄒賊已平大功已著山東  
撫臣兩疏薦之則其能辦賊明矣朝拜  
命夕受事以其威名懼彼妖黨必且俛首潛伏  
不敢復有異志詩曰薄伐玁狁蠻荆來威

其是之謂乎近見樞臣申飭率以年薦爲  
格夫實不可見則不得不俯而求之於名  
此樞臣之苦心也若夫冒矢石蹈白刃將  
軍有死之心士卒無生之氣於以收蕩平  
之烈而紓

南顧之憂大功在於

宗社姓名列於竹帛露布連章推薦相屬其於  
名實固已兼之今又冠冕甄別矣向使臣  
於發兵時如天津一體

題授宗漢不久與董世賢劉永昌等已歷俸  
數月乎緩急用人舉酒相祝而事平功著  
則獨不能當機酬之以鼓舞豪傑之氣乃  
以將士之力先自忝竊以靦顏於三軍之  
上卽有緩急其尚能爲我用乎此一臣者  
所當仍補紫荊關叅將員缺以昭

廟堂不踰時之賞終微臣不相負之言者也該  
臣會同出鎮行邊總督薊遼保定等處軍  
務兼理糧餉經略禦倭少傅兼太子太傅

兵部尚書兼都察院右都御史王象乾巡  
按直隸監察御史倪應眷潘文龍巡關御  
史潘雲翼合詞以

請伏乞

勅下兵部再加查議如果臣等所言不謬將新  
陞馬水浮圖遊擊等官秦光祚等免其候  
代定限二月內來到任其紫荊關叅將員  
缺速將協剿山東原任建昌路叅將劉宗  
漢起補烏龍溝寧靜安把總員缺就近推



補嚴限到任庶千里之間聲靈羅絡而卽  
有未盡餘孽必屏息而不敢動肘腋之患  
去而我乃以專力制奴奴固不足平矣天  
啓三年正月二十日題本月二十八日奉  
聖旨秦光祚等著催他依限到任如違拏究劉  
宗漢旣著勞績依議陞用餘著該部併覆

自陳疏

奏爲自陳不職乞

賜罷斥以肅計典事今歲復當內察之期該吏  
部題奉

欽依四品以上例應自陳臣山東東昌府堂邑  
縣人繇萬曆二十九年進士除授直隸廣  
平府推官陞吏部稽勲司主事歷陞文選  
司署郎中事主事

予告養病起南京太常寺少卿改太常寺少卿

再叨今職伏念臣性惟朴拙識不通方七  
載刑官畧無善狀一典銓選遂召人言自  
分迂濶已甘恬退豈期

擢蒙不次再躋清秩之班

寵眷有加復荷封疆之任臣卽至愚極陋仰沐  
洗濯洪恩敢不矢切捐糜妄圖報稱第撫臣繫  
安攘重寄而

畿南爲根本奧區雖當無事之秋猶嚴鎖鑰  
豈值多虞之日可忽藩籬如臣一介書生

學未諳于軍旅廿載通籍疾半痼于川巖  
倏然膺此馳驅茫乎莫知舉措卽如比者  
妖賊稱亂弄兵

神州赤縣之間臣不能先事爲備禡其魄而  
奪之氣而徒仰仗

天威徼倖一捷戕我之父老子弟以爲

君父憂則臣之迂踈不任亦槩可見矣以此妖  
黨已定再疏陳乞誠以濫竽危疆力小負  
重輿因席藁待罪之舉告疲于

陛下別簡材良而畀之以三軍之任緩則使不  
逞之徒膽寒于彈壓之有人急則爲

國家効一臂之用而中外相須如左右手是  
亦區區爲報之心也乃

皇上以覆載之宏德不卽加斥逐而臣亦以狗  
馬戀

主之私依依而不能去然而疆場之重終非章  
句腐儒所能堪勝卽臣受事以來非不手  
口並作食寢俱廢然兵家之事不在苦心

極力而在握乎其機未握其機著著皆誤  
正使報

主心長憂

國淚饒亦復何益從來獲罪邊疆者豈其心  
力有所未盡哉以無學無識之人習不見  
不聞之事退則有規避之嫌進則無尺寸  
之効其苦心嘔血者皆勉強于不得已而  
妄希鉛刀之一割故伎倆已窮而疆事壞  
然則

皇上今日亦何樂以千金之寶鼎付孱弱不任  
之懦夫使展轉反覆不能自勝卒至人與  
器俱敗乎况奴患方殷春防正急當茲猛  
獸跳梁之時豈宜野鶴乘軒之候與其迷  
復兆凶有傷

帝鑒何如引分知止早讓賢能此固微臣自審  
甚明而亦公論不容少貸者也伏乞

聖明將臣

立賜罷斥別選名流以充斯任庶駑鈍不至久

妨賢路而立壑亦可永歌

太平矣臣何勝隕越待

命之至天啓二年正月二十日奏本月二十八

日奉

聖旨張鳳翔著照舊供職吏部知道

催補緊要官員疏

題爲催補緊要官員以濟緩急事臣觀今之  
目

畿南者大率以爲腹裏之地方太平之世界  
而臣獨憂心如灼莫知計之所出何也山  
海一有聲息則千里之人心莫不震動一  
城須有一城之官一官始擔一官之事而  
展限常在五六月之間過里動逾數千里  
之外緩不肯行急不能到烽火一傳姦宄

四起左顧右盼杳無一人一城之中生靈  
百萬忙中無一人爲之主持誰能立脚一  
城甫動百城皆搖卽臣一身何能濟事項  
臣催補將領蒙

皇上

嚴旨申飭一時人心莫不震悚然此猶聽援官  
也聽援者聽援留守者留守皆不可缺今  
撫屬之府六而缺知府者二缺府佐者三  
而新被論了憂病故之官猶不與焉一順

德府知府胡維霖越在江右一廣平府知  
府唐玉越在閩中近者三四千里遠者五  
六千里一往一來勢須數月近正月二十  
九日廣平一妄男子忽傳訛言則十餘村  
之男婦莫不相率奔竄一夕而順德之沙  
河城市皆滿賴署印推官王徵永年縣知  
縣蘇守範單騎曉譬立捕妄男子張月及  
乘機搶掠財物者人心乃定

皇上視此景象地方可有守乎無守乎臣子擔

已著肩卽到不到皆有地方之責已到之責責在踈虞未到之責責在遲悞二守以男子自負豈肯誤此緊要地方所當催令刻期到任不得以展限久延者也一真定府同知張一鴻自蜀回籍寬限至五月到任真定爲臣駐劄地方造器甲建營房查錢糧點兵馬百責攸萃於同知李騰蛟一人之身手口竝作食寢俱廢其衙與太守隔壁壁光相望徹夜不輟眩暈怔忡猶日

日扶病收局匠驗鐵斤散錢糧如此辛苦無一幫手而一鴻必欲過此緊急時月過此時月何用本官事急矣不能待矣訪得河間府楊村同知楊森有才肯任事相距甚近數日可來相應調補真定府巡捕同知其張一鴻調補楊森員缺庶彼此有人緩急竝濟一可以湊微臣之手一可以佐勞臣之臂者也一大名府清軍同知馬逢樂過里染病繳憑到臣大名爲天雄重地

小灘劉三漢之變結連山東張掛逆榜幾  
成大亂賴舊大名府知府趙琦元城縣知  
縣熊江發覺蚤而決機迅不煩兵戈數日  
而定然地方數月間一經東明之亂再經  
開州之亂三經小灘之亂人情洶洶反側  
不定而一倅擬駐杜勝一倅委署內黃萬  
一有事孑然一守誰與協力訪得山東兗  
州府管黃河同知周淳有大才有定力可  
與應猝可與濟變盈盈一水瞬息可渡但

其歷俸已深相應量加長蘆運同職銜仍  
管大名府清軍同知事務其同知馬逢樂  
聞其居官大有正氣甚望其來本官偶感  
疾病恐誤地方輒願自引臣因地方緊急  
不能久待遂從其請相應改調別地以竟  
其用者也一保定府通判姜熊兆被論員  
缺道臣收拾兵馬須用得力府佐而徐騰  
芳每向臣嘆息苦地方官之不湊手此地  
此時若再一庸庸者至誰爲道臣一臂臣



詢之道府各廳率謂順德府通判楊文華  
有才學能集事而據臣所見安慶府通判  
邢裕家傳數學雅有文行向在謁選臣嘗  
欲得之相應以楊文華調補保定糧馬通  
判以濟目前之急而以邢裕調補順德通  
判以備行間之用者也此地緊急求之於  
銓除多不樂就求之於本屬又不多得故  
嘗留心咨訪凡有救時之才者不拘何地  
卽藉記之願致之近畿以備不時之用卽

各官之願不願不能卹也臣謹會同巡按  
直隸監察御史倪應眷潘文龍合詞以

請伏乞

勅下吏部再加查議如果臣等所言不謬將順  
德府知府胡維霖廣平府知府唐玉嚴催  
前來不許展限河間府楊村同知楊森調  
補真定府巡捕同知其同知張一鴻調補  
楊森員缺山東兗州府管黃河同知周淳  
量加長蘆運司同知職銜調管大名府同

知事務其同知馬逢樂另行調用順德府  
管糧馬通判楊文華調補保定府糧馬通  
判其文華員缺卽以直隸安慶府通判邢  
裕調補凡臣等所

請要在其人之可以濟事而其事之可以當機  
才不濟事雖累累若若何益於緩急之需  
事不當機雖汲汲皇皇何救於成敗之數  
國勢甚岌收拾已晚其雨其雨杲杲出日將  
從何地生活哉天啓三年二月十二日題

本月二十日奉

聖旨吏部知道

謝恩疏

奏爲恭謝

天恩事本年二月十二日准吏部咨爲妖賊蕩  
平懇乞首錄巡撫諸臣以重封疆以風勞  
臣事奉

聖旨趙彥蕩平妖賊功績懋隆加陞兵部尚書  
兼都察院右副都御史張鳳翔馮嘉會弭  
盜安民竝著勞績各陞都察院右副都御  
史俱照舊巡撫欽此又准吏部咨爲徵臣

無可賞之功

聖主有非功之賞懇乞

天恩俯容辭免以昭公道以安愚分事該臣奏  
前事奉

聖旨張鳳翔弭變安民勞績茂著加秩宜遵成  
命不准辭該部知道欽此欽遵備咨到臣  
隨恭設香案望

闕叩頭謝

恩外伏念臣識隘井蛙量微河颺雖切匡時之

志實無弭變之方妖將動而不能蚤解其  
迷亂已形而僅以兵芟其禍孰非赤子相  
逐青燐試神遊乎景武之間便汗浹于襟  
裾之下自分幽斥誰覲明揚在

聖主爲采菲采葑在微臣爲濡味濡翼力求辭  
免顛荷

褒嘉

成命難回覲顏何極念

畿輔爲腹心之地而犬羊實肘腋之憂自非

吾可以守而可以攻安望彼不敢侵而不  
敢畔無爲諸教辟水在地隨處可發而未  
發則不見滔滔汨汨之形有嚴斯民如木  
之皮一剝輒枯而旣枯則不復鬱鬱蔥蔥  
之盛拮据數月每忘餐忘寢以爲常痿痺  
多年非一夕一朝之可起心匪懸旌而自  
動日甚怔忡身如集木之將傾時增跼踖  
盖進秩非臣之素念而覆餗實臣之大憂  
也臣可勝惶悚感激之至天啓三年二月

二十二日奏本月二十七日奉

聖旨知道了該部知道

糾劾違法有司疏

題爲亟處違法有司以蘇民困事據天津道  
兵備副使王弘祖呈蒙臣憲牌爲申飭官  
收官解之法以一洗民間苦累事照得官  
收官解蓋不啻三令五申矣而試問諸民  
間有一不民收者乎有一不民解者乎禁  
自禁行自行此何說也或曰經手之無託  
也上納之難言也是也而要之在乎所以  
維持此法奈何去法法爲中人設而賢者

寧俯而就之以爲中人倡通其窮盡其變多方調劑以歸於不易精神旣透法法皆良惟此子遺嘉與休息以耕以鑿脫然無累亦叔世之華胥也除會同按院酌議妥確外相應通行爲此牌仰該道卽便轉行該府文到先較準該府天平一架平等一連卽照前式提較各州縣天平等子註府字樣頒發遵守諸凡收頭大戶斷自本年正月爲始一切裁革盡放歸農永不許僉

報一人各州縣二門兩旁舊有小房前置柵欄後開便道該掌印官擇忠實守法書役每櫃一名每名歲給工食銀十二兩查照原派銀兩動給該書黻明入房卽時封鎖銀櫃置柵欄一丈之外房內該書目得而見手不得而及府發平等懸於大門之外聽民隨便較量銀櫃不許設等銀匠不許打印衙役不許賣銀封該書不許看銀水止聽花戶或銀或錢封投入櫃該書止

於勾銷赤曆出給完票交割銀櫃此外毫  
無干涉十日拆封一次掌印官會同佐領  
教官逐封拆兌付銀匠看驗起解銀兩成  
錠滴珠不許零星兌驗明白用竹紙毛釘  
印封鞘匣不許另備印封臨時黏貼仍將  
鞘匣實鎖實封鑰匙竝封千兩以上委佐  
領百兩以上委驛巡數十兩以上差快手  
官每日給飯銀一錢跟隨四人每日各給  
四分快手每日五分俱於拆封積羨支給

該府置兌銀牌一面每三六九日收銀解  
銀員役隨銀牌入如投文然不得攔阻天  
平擡置對面庫吏驗放法馬卽退立五步  
之外該書在庫吏之後不得近前解銀員  
役稟驗封鎖親自秤兌一頭一封如有短  
少發回較驗不許添搭兌完仍卽時給批  
免其留難領解亦然當堂頒發兩頭自兌  
不許委官斂解如有陽革陰用蒙之以員  
役之名而居之以大戶之實者本院據道



府揭報或另有訪聞定將印官特疏叅拏  
衙門人役提問究遣仍取各大戶退狀繳  
查該府州縣刊刻木榜豎立門外永遠遵  
守毋得故違未便蒙此已經備行府屬州  
縣遵照去後正月十三日本道巡行至青  
縣地方接得告狀人劉印係運司竈戶青  
縣運坊里六甲籍告爲隱例殃民事蒙天  
示例州縣條鞭官收官解萬民蘇苦恩感  
二天見今交河等縣俱遵前例獨被本縣

戶書天膽包身欺官新任隱例不舉依舊  
民收民解見今火票拘拏應充櫃頭餞養  
迺馬又應十季一身數役破產傾家百姓  
聞風十家九逃怨聲載道印該本年見年  
因馬喫累不敢赴縣鎖拏家屬有死無生  
切况民竈攸分民當民役竈當竈差民家  
錢糧尚該官解竈當民役有負明恩叩批  
本縣查閱前例官收官解民竈獲生等情  
到道審問良久不覺髮指爲照方今吏治

之蠹莫大於招募與僉派竝行僉派之害尤莫大於櫃頭櫃頭者有司之外帑大戶之陷穽也本道受事以來力革僉派獨於櫃頭注意焉說者曰櫃頭沿襲已久驟爾報罷有司費將安出監司豈能見垣一方實實奉行此必不可得之有司者也用是與河間府知府廉第精心以籌之多方以處之求其官民兩便該府於收銀內八外八之陋規已先洗之矣內八者百兩以八

錢奉太守外八者百兩以八錢賂吏書該府令解役親敲天平左右無干輿人騰誦至於起解在京衙門吏書之需索中貴人之鋪墊有不得盡廢者通融計算加於額編條銀之內各數百金有差是增定也非加派也業已通詳批允奉行無礙竊念旣以加銀而儻復僉派是資有司之貪而重民生之困不得以此爲殿最官評第一義先是青縣知縣李大貞到任來謁本道

見其豈第爽豁面諭以河屬衝疲無過於青譬如久病尪羸僅存氣息本道老婆心切盡付該縣亦不敢以責成他州縣者一切相繩寬其文網假以便益官不負地地豈負官災民有瘳本道當吹噓上天矣本官唯唯而退豈期悅而不繹從而不改冥行一至此哉拘拏遞馬猶曰本院均攤之令府中酌議未定櫃頭之革三令五申業已豎石各州縣衙前明知而明違之本官

何辭以自解乎相應議處以蘇民困遺下員缺另除廉幹之吏勒期赴任若調停三年有救於青照例行取以酬循吏但其筮仕方新本道徘徊未決深用惜之又惟青何等縣今何等時本官卽更絃而鼓終非起死回生之手且本官熟聞宦套苟安積習妄意法未必行行未必力故不憚以身試法本道得於目擊本官之不幸實地方之幸也及今不處皮面相看觀望成風民

視憲令爲故紙官以監司爲阿保民生感  
而封疆隨之大可寒心夫民立於信徙木  
立之霸政猶然本道竊以此舉爲徙木寧  
受刻薄之名而不敢以婦人之仁養姦長  
亂噬臍無及也再照烹阿封墨人君所以  
磨厲一世也道屬奉法者固自不乏據狀  
審及交河供稱本官一應僉派俱行除免  
查得本縣知縣毛舜嶽亦係新任有此一  
片肝腸便是血性男子何憂民生不遂地

方不安相應特旌紀錄以示激勸者也本  
道察吏無他技巧惟是民安則吏亦安持  
是法也以往資格聲譽皆略而不論者矣  
伏乞速爲

題叅以肅吏治等情具揭到臣該臣會同巡  
按直隸監察御史倪應眷看得民生之困  
至今日極矣甦之未必生摧之將立斃臣  
所爲晝夜焦勞冀民稍稍休息而革櫃頭  
革馬頭革富戶革行戶革解戶革農民之

令無日不諄諄也青縣知縣李大貞聳耶  
曠耶臣輩一字一血幾於涕泣而道而獨  
不見不聞何耶櫃頭不去何有於馬頭馬  
頭不去何有於富戶行戶解戶農民彼其  
臆間舊套箇中秘訣百里爲市肆萬姓爲  
肥嚮各院道爲戲局索遵依則遵依而止  
勒刊榜則刊榜而止任臣輩嘔盡心血總  
不能到百姓之身而臣且柰之何哉嗟嗟  
彼鄰邑知縣毛舜嶽非縣令耶舜嶽初試

爲吏發政施仁必自櫃頭始而大貞何獨  
不然彼之歡聲動地此之怨言沸鼎縱不  
畏上官獨不愧其鄰耶此輩肝腸雖決東  
海不能洗滌計惟有三尺之法可以奪其  
所甚戀而動其所必不忍舍而要在隨訪  
隨參決不放過初猶降調繼則褫革專以  
數事程之以期於法之必行螟螣蝨賊秉  
畀炎火而田穉其庶無害乎伏乞

勅下吏部再加查訪如果臣等所言不謬將青

縣知縣李大貞重加降調以爲有司不奉  
法者之戒仍將交河縣知縣毛舜嶽特旌  
紀錄使天下知行仁政於邑而受美譽於  
朝是亦厲世磨鈍之道也天啓三年二月二  
十二日題本月二十七日奉  
聖旨吏部知道

請改 誥命疏  
奏爲比例陳情懇乞

天恩改給

誥命以光泉壤以廣

皇仁事恭惟我

皇考

皇上登極

覃恩之典率土均霑臣待罪奉常已蒙  
聖恩給與應得

誥命訖已而于役封疆又該吏部題准都察院  
右僉都御史

誥命尚未領受今蒙

聖恩陞臣右副都御史照舊巡撫臣拜

命之初卽擬謬具一疏仰干

聖聽妄覬新銜以榮臣之親於地下然臣固遂

巡未敢也武邑之役功微罪重幸蒙

聖恩不加斧鉞而復與于優叙之末臣願足矣

此外復何望乎已接邸報見山東巡撫趙

彥有比例陳情一疏奉

聖旨卿以叙功加陞准照例給與誥命吏部知

道欽此臣于是知

皇仁之浩蕩上同覆載而席藁待罪之身遂不

復自量矣夫臣固未嘗有功也卽以爲功

亦未敢與東撫趙彥埒也然向者誤蒙

聖恩一體優叙臣與趙彥同晉職級則是臣雖

無可賞之功而

皇上視之固若嘗效有涓滴者矣則是臣與東

疏草 卷之四  
撫雖不敢仰望其萬一而

皇上視之固若可追隨後塵者矣臣不佞敢就  
皇上之誤賞以爲功者妄意陳乞使臣之先人  
蒙

恩于九泉之下或亦

聖慈所不靳者乎緣臣情事偶與趙彥相符故  
敢冒死以

請儻

皇上不忍拂其一念之微准改新銜

誥命則臣感激

天恩無有窮已沒身碎首又豈足爲報哉臣下  
情無任戰慄祈懇待

命之至天啓三年三月十八日奏二十五日奉  
聖旨准改給吏部知道



國

銅同  
藏書

